

10. september 2013

Inatsisartut Suleriaasianni § 37 naapertorlugu matumuuna imatut apeqquteqaateqassaanga:

Ilaatigut makrelinik misileraalluni aalisarneq pillugu nalunaarusiami, Aalisarnermut, Piniarnermut Nunalerinermullu Naalakkersuisoqarfiup januaarip qaammataani 2013-imi pissarsiarisaani, Kitaani misileraalluni makrelinik aalisartoqarnissaa kaammattuutigineqarpoq, makreleqatigiit/makreleqatigiit immikkoortut suminngaanneernerisa paasineqarnissaat siunertaralugu. Siunissami makrelit pillugit nunat tamalaat akornanni Kalaallit Nunaata isumaqatigiinniarnissaanut aalisakkap suminngaanneerera annertuumik sunniuteqarsinnaavoq. 2013-imi kaammattuutigineqartup Naalakkersuisunit malinneqannginnera ilumoorpa, taamaassimappat Naalakkersuisut kaammattuutigineqartoq 2014-imi malinnialersaarnerlugu?

(Inatsisartunut ilaasortaq Jens B. Frederiksen, Demokraatit)

Tunngavilersuut:

Naalakkersuisut siuliisa 2010-mi, 2011-mi 2012-imilu ilaatigut makrelinik misileraalluni aalisarnissamut akuersissuteqarput.

Aalisarnermut, Piniarnermut Nunalerinermullu Naalakkersuisoqarfik Tunumi ukiup siuliani ilaatigut makrelinik misileraalluni aalisarneq pillugu nalunaarusiamik januaarip qaammataani 2013-imi tigusaqarpoq. Nalunaarusiaq Pinngortitaleriffik misileraallunilu aalisartut suleqatigalugit suliarineqarpoq.

Nalunaarusiami ilaatigut tikkuarneqarpoq, makrelit Europap imartaaneersuunersut, Canadameersuunersut imaluunniit taakkunanga akuleriittumik suminngaanneerfeqarnersut ilisimaqqissaarneqanngitsoq. Aalisakkap suminngaanneerera siunissami makrelit pillugit nunat tamalaat akornanni Kalaallit Nunaata isumaqatigiinniarnissaanut annertuumik sunniuteqarsinnaavoq. Taamaammat nalunaarusiami kaammattuutigineqarpoq, tulliani misileraalluni aalisartoqalerpat aamma Kitaani makrelinik misileraalluni aalisartoqassasoq.

2013-imili misileraalluni aalisarnissamut akuersissutit pillugit Naalakkersuisut ukiormanna maajip qaammataani tusagassiorfinnut nalunaaruteqarmata, Naalakkersuisut Tunumi misileraalluni aalisarnissaq kisiat nalunaarutigaa.

Tamanna tunngavigalugu Naalakkersuisut Kitaani makrelinik misileraalluni aalisartitsinissamik kaammattuuteqartoqarnera malinneraat paaserusuppara. Taamaassimangippat, Naalakkersuisut 2014-imi taamatut pilersaaruteqarnersut aamma paaserusuppara.

Apeqqut tunniunneqarneranit ullut suliffiit qulit qaangiutsinnagit akineqarnissaa kissaatigaara.